

ონლაინ პლატფორმის მეშვეობით ელექტრონული სერვისის - „შენი იდეა მუნიციპალიტეტის მერს“  
განხორციელების წესი

**მუხლი 1. ზოგადი დებულებები**

1. ონლაინ პლატფორმის მეშვეობით ელექტრონული სერვისის - „შენი იდეა მუნიციპალიტეტის მერს“ (შემდგომში იდეა) განხორციელების წესი (შემდგომში - წესი) შექნილია ა(ა)იპ „მუნიციპალური სერვისების განვითარების სააგენტოსა“ და ჩოხატაურის მუნიციპალიტეტის თანამშრომლობის ფარგლებში, ჩოხატაურის მუნიციპალიტეტის მერიის (შემდგომში - მერია) საქმიანობაში მოსახლეობის ჩართულობისა და მუნიციპალიტეტისათვის მნიშვნელოვანი საკითხების თაობაზე ინიციატივების წარდგენის უზრუნველყოფის მიზნით.
2. იდეის წარდგენა შესაძლებელია, თუ მასში დასმული საკითხის გადაჭრა წარმოადგენს ჩოხატაურის მუნიციპალიტეტის უფლებამოსილებას.
3. იდეის წარდგენის უფლებით სარგებლობს ჩოხატაურის მუნიციპალიტეტში რეგისტრირებული სრულწლოვანი პირი, აგრეთვე მუნიციპალიტეტში მოქმედი იურიდიული პირები.
4. ხმის მიცემის უფლებით სარგებლობს ჩოხატაურის მუნიციპალიტეტში რეგისტრირებული სრულწლოვანი პირი.
5. მუნიციპალიტეტისათვის მნიშვნელოვანი საკითხების თაობაზე ინიციატივების წარდგენის პროცედურა და თემატიკა განისაზღვრება ამ წესით.

**მუხლი 2. განხილვას დაქვემდებარებული საკითხები**

1. იდეის ფარგლებში შესაძლებელია წარდგენილი იქნას წინადადებები შემდეგ საკითხებზე:
  - ა) საგზაო ინფრასტრუქტურა;
  - ბ) სატრანსპორტო ინფრასტრუქტურა;
  - გ) ნარჩენების მართვა;
  - დ) წყალ-კანალიზაცია, გარე განათება და კეთილმოწყობა;
  - ე) მუნიციპალიტეტის ტერიტორიის გამწვანება;
  - ვ) სკოლამდელი, არაფორმალური და პროფესიული განათლება;
  - ზ) შშმ პირთა ინკლუზია და მათთვის გარემოს ადაპტაცია;
  - თ) კულტურული, სპორტული და ახალგაზრდული საკითხები;
  - ი) ჯანმრთელობის დაცვა და სოციალური უზრუნველყოფა;
  - კ) ჯანსაღი და უსაფრთხო საცხოვრებელი გარემოს უზრუნველყოფა;
  - ლ) ეკონომიკური განვითარება.
2. იდეის ავტორს უფლება აქვს წარადგინოს წინადადება სხვა საკითხებზეც, რომლებიც შედის მუნიციპალიტეტის მერის კომპეტენციაში და არ ეწინააღმდეგება ამ წესსა და მოქმედ კანონმდებლობას.

**მუხლი 3. დაუშვებელი იდეა**

1. იდეა არ ექვემდებარება განხილვას, თუ მასში მოცემული საკითხი:
  - ა) ეწინააღმდეგება საქართველოს კონსტიტუციასა და კანონმდებლობას;
  - ბ) შეეხება მხოლოდ ერთი ან რამდენიმე პირის პირად ინტერესს;
  - გ) სახუმარო ან უცენზურო ვიზუალური მასალის ან შინაარსის მქონეა;
  - დ) არ შედის ჩოხატაურის მუნიციპალიტეტის მერის კომპეტენციის ფარგლებში და მისი გადაწყვეტა წარმოადგენს სხვა უწყების კომპეტენციას;
  - ე) წარმოადგენს სასამართლოში ან ადმინისტრაციულ ორგანოში მიმდინარე დავის საგანს ან კანონმდებლობით პირდაპირ არის დადგენილი საკითხის რეგულირების პროცედურა, რომელიც გამორიცხავს იდეის საფუძველზე მის გადაწყვეტას;

ვ) იდეის შინაარსი იდენტურია უკვე არსებული მიმდინარე იდეისა/იდეას ბოლო 6 თვის განმავლობაში მიღებული აქვს უარყოფითი რეკომენდაცია/იდეა ერთხელ იყო ხმის მიცემის ეტაპზე და ვერ მოაგროვა ხმების საჭირო რაოდენობა/იდეას მიღებული აქვს დადებითი რეკომენდაცია და მისი სავარაუდო შესრულების მითითებული ვადა ჯერ არ არის ამოწურული.

#### **მუხლი 4. იდეის წარდგენა**

1. იდეის წარდგენა ხდება დადგენილი ელექტრონული ფორმით ვებ-გვერდზე [idea.municipal.gov.ge](http://idea.municipal.gov.ge), რეგისტრაციის გავლის და სისტემაში ავტორიზაციის შემდეგ შესაბამისი ველების შევსების გზით.

1.1. იდეის ავტორის მიერ შესავსები ველები:

- ა) იდეის კატეგორია;
- ბ) იდეის დასახელება;
- გ) იდეის აღწერილობა;
- დ) იდეის განხორციელების გონივრული ვადა;
- ე) იდეის ბიუჯეტი.

1.2. იდეის ავტორის მიერ ასატვირთი დოკუმენტაცია:

ა) ფოტო (ინიციატორის მიერ ატვირთული ფოტომასალა, იმ გარემოს/ადგილის შესახებ, სადაც უნდა განხორციელდეს კონკრეტული პროექტი. ფოტო შეიძლება იყოს რეალური გარემოს ამსახველი ან ფოტომონტაჟი. შესაძლებელია ორივე შემთხვევა ერთად;

ბ) ხარჯთაღრიცხვა;

გ) დანართი (იგულისხმება ყველა ის დოკუმენტი, რომლის ატვირთვის და მიწოდების სურვილის აქვს ინიციატორს მუნიციპალიტეტისთვის).

2. იდეის წარდგენიდან 10 (ათი) კალენდარული დღის ვადაში, ხდება იდეის ამ წესთან შესაბამისობის შემოწმება. შესაბამისობას ამოწმებს მუნიციპალიტეტის მერის ინდივიდუალური ადმინისტრაციულ-სამართლებრივი აქტით განსაზღვრული, შესაბამის იურიდიული განათლების მქონე თანამშრომელი.

3. თუ იდეა ეწინააღმდეგება ამ წესის მოთხოვნებს, დასაბუთებული უარი ეცნობება იდეის ავტორს ელექტრონულად.

4. თუ იდეა არ ეწინააღმდეგება ამ წესის მოთხოვნებს, თუმცა მისი წარდგენის დროს იდეის ავტორის მიერ დაშვებულია გარკვეული შინაარსობრივი ან სხვა ტიპის ხარვეზები, ასეთი შემთხვევაში ხარვეზის შესახებ ეცნობება იდეის ავტორს, რომელმაც 15 (თხუთმეტი) კალენდარული დღის ვადაში უნდა აღმოფხვრას აღნიშნული ხარვეზი. მითითებულ ვადაში ხარვეზის გამოუსწორებლობის შემთხვევაში, იდეა გახდება უარყოფილი.

5. შემოწმების შემდგომ, იმ შემთხვევაში თუ იდეა არ ეწინააღმდეგება ამ წესს, იგი გამოქვეყნდება ვებ-გვერდზე [idea.municipal.gov.ge](http://idea.municipal.gov.ge) და ამის შესახებ ელექტრონულად ეცნობება იდეის ავტორს.

6. იდეის გამოქვეყნებიდან 60 (სამოცი) კალენდარული დღის განმავლობაში, ჩოხატაურის მუნიციპალიტეტში რეგისტრირებულ მოსახლეობას შესაძლებლობა ეძლევა ელექტრონული ფორმით ხმა მისცენ გამოქვეყნებულ საკითხს.

7. იმისათვის, რომ იდეით განსაზღვრული საკითხი დაექვემდებაროს განხილვას, მას ხმა უნდა მისცეს ჩოხატაურის მუნიციპალიტეტში რეგისტრირებული ამომრჩევლის 1 (ერთი) პროცენტმა.

#### **მუხლი 5. იდეის განხილვა**

1. იდეის მიერ ამ წესის მე-4 მუხლის მე-7 პუნქტით განსაზღვრული რაოდენობის ხმების დაგროვების შემთხვევაში, იდეა განიხილება მუნიციპალიტეტის მერის მიერ, რომელიც იღებს ერთ-ერთ შემდეგ გადაწყვეტილებას:

- ა) იდეის შესრულების განხილვის თაობაზე;
- ბ) იდეის დაკმაყოფილებაზე უარის თქმის შესახებ.

2. ამ წესის მე-5 მუხლის პირველი პუნქტის „ა“ ქვეპუნქტის შემთხვევაში, იწყება იდეის შესაძლო შესრულების განხილვის პროცედურა. მუნიციპალიტეტის მერი ინდივიდუალური ადმინისტრაციულ-

სამართლებრივი აქტით განსაზღვრავს შესაბამის პირებს, რომლებიც 40 (ორმოცი) კალენდარული დღის ვადაში ასრულებენ იდეის განხორციელების განხილვის პროცედურას და თავიან გადაწყვეტილებას წარუდგენენ მუნიციპალიტეტის მერს.

3. ამ მუხლის მე-2 პუნქტის განსაზღვრულ პირებს უფლება აქვთ საჭიროების შემთხვევაში იდეის სრულყოფილად განხილვის მიზნით, მისი ავტორისგან გამოითხოვონ დამატებითი ინფორმაცია/დოკუმენტაცია.

4. მუნიციპალიტეტის მერი, ამ მუხლის მე-2 პუნქტის განსაზღვრული პირების მიერ განხილვის დასრულების შემდეგ, 10 (ათი) სამუშაო დღის ვადაში იღებს გადაწყვეტილებას იდეის შესრულების ან იდეაზე უარის თქმის შესახებ.

5. ამ მუხლის მე-4 პუნქტით გათვალისწინებული გადაწყვეტილების მიღების შემდეგ იდეის ავტორსა და ხმის მიმცემ პირებს, მუნიციპალიტეტის მერის მიერ გადაწყვეტილების მიღებიდან 5 (ხუთი) სამუშაო დღის ვადაში ელექტრონულად ეგზავნებათ შეტყობინება აღნიშნულის შესახებ საკუთარ პროფილზე ან ელ. ფოსტაზე (არსებობის შემთხვევაში), სადაც მითითებული იქნება გადაწყვეტილების შესრულების სავარაუდო ვადა.

6. ამ მუხლის პირველი პუნქტის „ბ“ ქვეპუნქტის საფუძველზე, იდეის დაკმაყოფილებაზე უარის თქმის შემთხვევაში, იდეის ავტორსა და იდეისთვის ხმის მიმცემ პირებს მერის მიერ გადაწყვეტილების მიღებიდან არაუგვიანეს 5 (ხუთი) სამუშაო დღის ვადაში ელექტრონულად ეგზავნებათ შეტყობინება აღნიშნულის შესახებ, იმ შემთხვევაში თუ პლატფორმის შესაბამის გრაფაში დაფიქსირებული აქვთ ელ. ფოსტის მისამართი ან გააჩნიათ საკუთარი პროფილი.

7. ამ წესის მე-3 მუხლით გათვალისწინებული საფუძვლის არსებობა შეიძლება ნებისმიერ ეტაპზე გახდეს იდეაზე უარის თქმის საფუძველი.

#### **მუხლი 6. იდეის პლატფორმა და განხილვის პროცედურების მენეჯმენტი**

1. იდეის პლატფორმას მართავს და ამ წესით დადგენილი პროცედურებისა და ვადების დაცვას ზედამხედველობს ჩოხატაურის მუნიციპალიტეტის მერიის ადმინისტრაციული სამსახური.

2. მუნიციპალიტეტის მერი, იდეის შესაძლო შესრულების პირობების განხილვის შინაარსობრივ და ორგანიზაციულ ხელმძღვანელობას ავალებს მერიის შესაბამის სტრუქტურულ ერთეულს ან/და განსაზღვრულ პასუხისმგებელ პირს, რომელიც უზრუნველყოფს იდეის შესახებ გადაწყვეტილების პროექტის მომზადებას და მუნიციპალიტეტის მერისთვის წარდგენას.

3. ამ წესით დადგენილი პროცედურების დარღვევის შემთხვევაში, წესის შესრულებაზე პასუხისმგებელი პირი ვალდებულია აღნიშნულის შესახებ შუამდგომლობით მიმართოს მუნიციპალიტეტის მერს.